



Inatsisartunut ilaasortaq Anthon Frederiksen, Partii Naleraq  
MAANI

**Aatsitassat aamma ujaqqat pinneraasiassat pillugit § 37 naapertorlugu  
apeqquteqaammut nr. 2015-110-imut akissuteqaat**

Inatsisartut suleriaasianni § 37, imm. 1 naapertorlugu apeqqutit matuma kinguliani  
allassimasut Naalakkersuisunut saqqummiuppatit, taakkualu matumuuna  
akissuteqarfigineqarput.

Aallarniutigalugu eqqumaffigeqquneqassaaq apeqquteqaammut 2015-082-imut  
akissuteqaammut malitseqartitsilluni apeqquteqaat matumani pineqarmat.

29. april 2015  
Suliap nr. 2015-110245

Postboks 930  
3900 Nuuk  
Tlf. (+299) 34 88 00  
Fax (+299) 32 43 02  
E-mail: mmr@nanoq.gl  
www.naalakkersuisut.gl

**1. Apeqqut nr. 2-mut Naalakkersuisoqarfiup akissutaanut tunngasoq. Piffissap  
suup iluani nunaqavissut qinnuteqarnissaminnut periarfissarinikuugamikku  
tassani piffimmi?**

Akissut:

Kalaallit Nunaanni aatsitassanut ikummatissanullu inatsimmi siullermi<sup>1</sup> § 1, imm. 2-  
imi aalajangersarneqarpoq, Kalaallit Nunaanni innuttaasut maannamut suleriaaseq  
malillugu akuersissummik peqaratik aamarsuarnik, issumik, ukkusissamik,  
ujaraaqqanik, ujaqqanik assigisaannillu pissamaasersorsinnaasut.

Kalaallit Nunaanni aatsitassanut tunngatillugu inatsisit  
allangortinneqartarsimagaluartut, Namminersornerup 2009-imi  
atuutsinneqalernerani Namminersorlutik Oqartussat Aatsitassanut  
suliassaqaarfimmik tigusinissaasa tungaanut, sumiiffiit kisermaassisussaataaffiusut  
ataqquillugit, niuernermik tunngaveqanngitsumik atorneqartussanik akuersissummik  
peqaratik aatsitassanik akisunnginnerusunik Kalaallit Nunaanni innuttaasut  
katersinissamut periarfissaqarnerat allangortinneqarsimangilaq.

2009-imi katersisartut najukkaneersut kissaateqarnerat malillugu annikitsumik  
aatsitassarsiorluni misissuinissamut paaanissamullu atugassarititaasut  
nalinginnaasut atuutsinneqalerput.

Tamatuma kingorna annikitsumik aatsitassarsiorluni misissuinissamut  
paaanissamullu maleruagassat aatsitassat pillugit ingerlatallu tamatumunnga  
pingaarutillit pillugit inatsisartut inatsisaat nr. 7, 7. december 2009-imeersumi  
(aatsitassanut ikummatissanullu inatsit) kapitali 8-imi ilanngunneqarput.

Taamaattumik sumiiffik annikitsumik aatsitassarsiorluni misissuinissamut  
paaanissamullu maleruagassat malillugit 2009-imi nunaqavissunit  
qinnuteqarfigineqarsinnaavoq.

<sup>1</sup> Lov af 12. maj 1965 om mineralske råstoffer i Grønland

Taamaattoq nunaqavissut aatsitassanut ikummatissanullu inatsisini atuuttuni maleruagassanut naapertuuttumik, aatsitassarsiorluni misissuinissamut piiaanissamullu akuersissummik tamatigut qinnuteqarsinnaasimapput.

2. "Aatsitassarsiorluni misissuinissamut pisussaaffik" sumut tunngava?  
Apeqput 3-mi akissummi eqqartugaq.
- a. Annikitsumik aatsitassarsiorlut ukiumoortumik 1.000 kr-mik akiliuteqartarput 1 kvm-imut. Imaappa taava nunaminertamik "pisineq" allamiut suliffeqarfiutaannut akikinnerusoq, nunaqavissunut sanilliutissagaanni? North Gems-immi 63 kvm 39.100 kr-ilersimammagu.

Akissut:

Annikitsumik aatsitassarsiorlunissamut akuersissutinut aatsitassarsiorluni misissuinissamut pisussaaffeqartitsisoqanngilaq.

Akiliuterpiaq, kisermaassisussaatitaalluni annikitsumik aatsitassarsiorlunissamut akuersissummut 1.000 kr., aamma aatsitassanut suliassaqarfimmi aatsitassarsiorluni misissuinissamut akuersissummut nalinginnaasumut 39.100 kr. allaffissornermut akiliutissaapput aalajangersimasuusut. Akuersissummik "pisoqarsimasoq" tassani pineqanngilaq. Tassani pineqarpoq oqartussaasut suliarinninnerannut aningaasartuutinut matussutaasussanik akiliummik akiliuteqarneq.

Tassunga atatillugu ilisimatitsissutigineqarsinnaavoq, aatsitassarsiorluni misissuinissamut qinnuteqaatip suliarineqarneranut aammalu qinnuteqaatinut, akuersissuteqarnermut aamma pisinnaatitsissummik pigisaqartut suliaqarnermi pisussanut pilersaarutaannik malinnaanermut, ujarassiornermik nalunaarutiginninnermut, nakkutilliinermut ilaalu ilanngullugit, atatillugu ukiuni tulliuuttuni tallimani oqartussaasut suliarinninnerannut, piffissamik atuinermi agguaqatigiissillugu qanoq akeqarnersoq malillugu aatsitassarsiorluni misissuinissamut akuersissutinut nalinginnaasunut akiliut 39.100 koruuniusoq aalajangersagaammat. Peqatigisaanik ilisimatitsissutigineqarsinnaavoq kisermaassisussaatitaalluni annikitsumik aatsitassarsiorlunissamut akuersissummut akiliut 1.000 koruuniusoq, annikitsumik aatsitassarsiorlunissamut akuersissummik qinnuteqaateqarnermut, akuersissuteqarnermut aamma malinnaanermut atatillugu oqartussaasut suliarinninnerannut aningaasartuutit matussusernissaannut naammanngitsoq. Tamatumunnga pissutaavoq 2012-imi aalajangerneqarmat, akiliutip maani najugaqartut annikitsumik aatsitassarsiorlunissamut akuersissutinik qinnuteqanngitsoortinnissaat pinngitsoorniarlugu, kisermaassisussaatitaalluni annikitsumik aatsitassarsiorlunissamut akuersissummut akiliut 5.000 koruunimiit 1.000 koruunimut appartinneqassasoq. Peqatigisaanik kisermaassisussaatitaanani annikitsumik aatsitassarsiorlunissamut akuersissummut akiliut 1.000 koruunimiit 500 koruunimut appartinneqarpoq. Taamanikkulli annikitsumik aatsitassarsiorlunissamut akuersissut amerlassusaat annertooujussuarmik amerliartorput.

Ingerlatseqatigiiffiit aatsitassarsiornermut suliassaqarfimmi aatsitassarsiorluni misissuinissamut akuersissummik nalinginnaasumik peqartut, matuma siuliani akissuteqaammi oqaatigineqartutut aatsitassarsiorluni misissuinissamut pisussaaffeqarput. Aatsitassarsiorluni misissuinissamut pisussaaffik taanna akuersissutip angissusaa apeqqutaatillugu km<sup>2</sup>-imut ataatsimut pisussaaffiliivoq, aamma akuersissut qanoq "pisoqaatiginersoq" apeqqutaalluni. Tamatumunnga pissutaavoq km<sup>2</sup>-imut ataatsimut aatsitassarsiorluni misissuinissamut pisussaaffiup akuersissutip "pisoqaliartornerani" annertusiartortarnera.

Paarlattuanik annikitsumik aatsitassarsiornissamut akuersissutit aatsitassarsiorluni misissuinissamik pisussaaffiliiffigineqanngillat.

Aningaasanut aalajangersimasunut, ukiut ingerlaneranni qaffakkiartortunut, ujarassiornikkut aatsitassarsiorluni misissuisoqassasoq aamma misissuinerit ingerlanneqassasut, aatsitassarsiorluni misissuinissamut akuersissutinut nalinginnaasunut atuuppoq. Ukiut tamaasa kingusinnerpaamik 1. april ingerlatseqatigiiffiit Aatsitassanut Ikummatissanullu Aqutsisoqarfimmut naatsorsuutinin kukkunerisuisartumit atsiorneqarsimasunik nassiussisartussaapput, taamatullu taakkua misissuinerit suliarisimasatik aammalu misissuinerit inernerit pillugit nalunaarusiamik nassiussisartussaapput. Ujarassiornermit paasisutissat nalunaarsukkat tamamik Aatsitassanut Ikummatissanullu Aqutsisoqarfimmut tunniunneqartartussaapput.

**3. Naalagaaffimmut nalunaarutigisartagassat, appeqqut 5.**

- a. Namminersorlutik Oqartussat aamma naalagaaffimmut nalunaarusiortartussaappat? Tassani pineqarput annikitsumik aatsitassarsiorlutik atuinissamut akiliutigisartagaanniit, taavalu isertitaanniit?**

Akissut:

Aap.

Kalaallit Nunaanni namminersorneq pillugu inatsimmi nr. 473, 12. juni 2009-imeersumi § 7, imm. 2-imi allassimavoq, 1), isertitat makkua isertitanik naatsorsuineri ilaatinneqassasut:

"2) Danmarkimi aamma Kalaallit Nunaanni akileraarutinik isertitat tamamik, suliffeqarfinit Kalaallit Nunaanni atortussiassanit aatsitassarsiornermut tunngasunik pisinnaatitaanermut akuersissutinik pigisalinnit pisut."

Assersuutigalugu annikitsumik aatsitassarsiornissamut akuersissut aqutigalugu rubininik niuernerimik tunngaveqartumik pianaanermik ingerlatsisoqarpat, aammalu pisinnaatitsissummik pigisaqartoq akileraarutinik akiliippat, tamanna nalunaarsorneqartussaavoq aammalu naalagaaffimmut nalunaarutigineqartussaalluni.

**4. Apeqquut 6-imi akissummi paasinarsivoq ukiut 30-t sinnerlugit piffiup pisuussutai naluneqarsimanngitsut. Naalakkersuisoqarfiup innuttaminnut inuussutissarsiutigineqarsinnaasut ussasaarutigini kuuaa?**

Akissut:

Siusinnerusukkut akissuteqaataasumi oqaatigineqartuni saqqummersitani assigiinngitsuni nassuiaasoqarsimagaluartoq, ujaqqat pinneraasiassat pitsaassusaat ujaqqanik pinneraasiassalerinikkut nassuiarneqarsimanngilaq, taamaattumillu korund sumiiffimmeersoq nunani tamalaani tunineqarsinnaalluni pitsaassuseqarnerisooq ilisimaneqanngilaq.

§ 37 naapertorlugu apeqquummut 2015-082-imut imm. 7-imut akissuteqaammi taaneqartutut, sumiiffiit sorliit ujaqqanut pinneraasiassanut tunngatillugu nunap assiliorfigineqarsinnaasut pillugit, maannakkorpiaq misissuineq ingerlanneqarpoq. Aatsaat nunap assiliorneq taanna ingerlanneqareerpat, aammalu ujarassiornikkut aamma ujaqqanik pinneraasiassalerinikkut nassuiaatit paasisallu naammassineqareerpa, ujaqqat pinneraasiassat sumiiffiisa najukkani

innuttaasunut nittarsaanneqarnissaannut tunngavissaqalissaaq. Paasissutissat paasissutissanik tunngaveqartumik ingerlateqqinneqartarnissaat pingaaruteqarpoq, taamaallilluni innuttaasut isumalluutitut aningaasanillu suliassani suliatigut uppersaaserneqanngitsuni aningaasaliisassanatik.

Oqaatigineqassaaq Kangerluarsummi sumiiffik Maniitsormiunit ukiorpassuarni ilisimaneqarsimammat, aammalu siusinnerusukkut aatsitassat sumiiffimmi nassaarineqartut atorlugit pinnersaasiassanik annikitsumik sananiartoqartarsimalluni.

**5. Akissummi nr. 8-mi akineqarpoq ujaqqat erlinnartut eqqartoraanni nunaqavissut sallitinneqanngitsut.**

- a. Ujaqqat erlinnartut pinnersaasiassat tassaagunarmata tunisassiarineqarsinnaasuni tamani, oqimaassusaat isigissagaanni, nalitunerpaat. Sooruna nunaqavissut sallitinneqanngitsut?**
- b. Nunat nunarsuarmi allat isigissagutsigit. Sumi nunami allami allamiut suliffeqarfiutaat ujaqqanut erlinnartunut sallitinneqarpat?**
- c. Nunatsinni nunaqavissunut ujaqqanik erlinnartunik ujarlernermi atuinissamilu sanillitinneqarnissaat Naalakkersuisunit inatsisitigut tunngavilerneqarnissaa suliniutiginiarneqarjaa?**
- d. Suunuku aatsitassat / ujaqqat nunaqavissuniit tunisassiaralugit katersorneqarsinnaasut?**

Akissut:

a.

Namminersorlutik Oqartussat aatsitassanut ikummatissanullu inatsimmi § 2, imm. 1 naapertorlugu Kalaallit Nunaanni aatsitassat tamaasa piginissaannut atorluarnissaannullu piginnittussaataapput. Aatsitassanut ikummatissanullu inatsit aammalu aalajangersakkat tassunga tunngassuteqartut naapertorlugit, annikitsumik aatsitassarsiornissamut akuersissutit aammalu aatsitassarsiornissamut akuersissutit nalinginnaasut qinnuteqaatigineqarsinnaanerannut suleriaatsit assigiinngitsuupput, taakkua malillugit qinnuteqaatit taakkua nalilersorneqartarlutik aammalu naggataatigut Naalakkersuisunit akuersissuteqarfigneqartarlutik imaluunniit itigartinneqartarlutik.

Siusinnerusukkut oqaatigineqartutut Maniitsup eqqaani Kangerluarsummi korundinik peqarfik ukiorpassuarni najukkami innuttaasunit ilisimaneqarsimavoq, taamaattumillu nunaqavissut peqarfimmi tassani imaluunniit peqarfinni allani pīaanissamut periarfissaqarsimallutik.

Annikitsumik aatsitassarsiornermut suliassaqqarfimmi suliniutit Uuliasiornermut aamma Aatsitassanut periusissami nassuiarneqartut, tamatuma kingorna "Kalaallit Nunaanni ujaqqanut pinnersaasiassanut inuussutissarsiuteqarnermik ineriartortitsinissamut inuiaqatigiinni periarfissaqqarfiusut pillugit nassuiaammi" takkuttussami itisiliiffigineqarput. Nassuiaat piffissap sivikitsuaqqap ingerlanerani tamanut saqqummersinneqassasoq naatsorsuutigineqarpoq.

Nassuiaammi periusissatut suliniuteqarfissatut siunnerfiusut arfineq pingasut nassuiarneqarput. Pingaarnepaat tassaapput:

- Sumiiffinnik annikitsumik aatsitassarsiornissamut suliassanut immikkoortitsineq
- Ujaqqanik pinnersaasiassanik peqarfinnut sukumiisumik nunap assiliorneq

- Annikitsumik aatsitassarsiornissamut pisinnaatitsissummik pigisaqartunik aamma ujaqqanik pinnerasaasiassanik tunisassiorartunik /ujaqqanik pinnerasaasiassanik tuniniaasartunik pikkorissaanerit

Ujaqqanik pinnerasaasiassanik suliassaqarfimmi annikitsumik aatsitassarsiornermut suliassanik aammalu aatsitassarsiortuni misissuinermi piiaanermilu suliassanik ingerlatseqatigiiffinit annerusunit ingerlanneqartunik peqarnera, iluaqutissartaqartut Naalakkersuisut isigaat.

Ujaqqanik pinnerasaasiassanik/ujaqqanik erlinnartunik peqarfiusinnaasunut ujarassiornikkut aamma ujaqqanik pinnerasaasiassalerinikkut nunap assiliorneq suliassaavoq annertoq aamma akisooq. Suliaqarneq taanna ingerlatseqatigiiffinit aatsitassarsiortunik misissuinermik suliqaartartunit iluaqutaasumik ingerlanneqarsinnaavoq. Ingerlatseqatigiiffiit aatsitassarsiortunik misissuinerannit paasissutissat nalunaarsukkat Namminersortunik Oqartussanut tunniunneqartussaapput, taamaalillunilu ujaqqanik pinnerasaasiassanik peqarfinnik ilisimasaqarneq annertusisinnaalluni, aammalu tamatuma kingorna sumiiffiit annikitsumik aatsitassarsiortuni suliassanut inniminnernissaannut iluaqutaasinnaallutik. Ingerlatseqatigiiffiit ujaqqanik pinnerasaasiassanik peqarfiit uppernarsarneqarnerannut iluaqutaasinnaanerisa saniatigut, ingerlatseqatigiiffiit Kalaallit Nunaata ujaraannut pinnerasaasiassanut nunani tamalaani soqutiginninneq, tuniniaanissamik nittarsaassinermik suliqaarnertik aqutugalugu, siuarsarsinnaammassuk, iluaqutissartaqarsinnaavoq.

Taamaattumik Naalakkersuisut isumaqanngillat annikitsumik aatsitassarsiornissamut pisinnaatitsissummik pigisaqartut ujaqqanut pinnerasaasiassanut /ujaqqanut erlinnartunut salliusussaataaassasut, kisianni paarlattuanik annikitsumik aatsitassarsiortuni suliassat aamma aatsitassarsiornermi suliassat annertunerusut akornanni ataqatigiissitsinermi ujaqqanut pinnerasaasiassanut suliassaqarfiup ineriartortinneqarnissaa iluaqutissartaqartut isigalugu.

b.

Apeqqummi oqaatiginiarneqarpoq ingerlatseqatigiiffiit nunanit allaneersut ujaqqanik erlinnartunik/ujaqqanik pinnerasaasiassanik peqarfiusinnaasunut salliusussaataaasut. Taamaattoqanngilaq. Namminersortunik Oqartussat tassaapput aatsitassanik piginnittuunissamut atorluanaanissamullu piginnittussaataaasut.

Ingerlatseqatigiiffiit nunami aalajangersimasumi angerlarsimaffeqartuunngitsut, ingerlatseqatigiiffinnut/innuttaasunut nunami pineqartumi angerlarsimaffeqartunut sanilliullugit peqarfinnut salliusussaataaansut pineqartillugu, politikkit suut nunarsuup sinnerani atorneqarnerisut, Aatsitassanut Ikummatissanullu Naalakkersuisoqarfiup ilisimasaqarfigingilaa.

Kisiannili ujaqqat pinnerasaasiassat imaluunniit aatsitassat erlinnartut pineqartillugit, aatsitassarsiortuni misissuunissamut, piiaanissamut, aatsitassanik akisuunik tuniniaanissamut imaluunniit pisinissamut akuersissummik peqarnissap piunasaqaatigineqartarnera, nunani aatsitassarsiornermik pilersitsilluareersimasuni tamaginni nalinginnaalluinnartumik suleriaasiuvoq.

c.

Naamik. Ujaqqanik erlinnartunik/ujaqqanik pinnerasaasiassanik peqarfinnut imaluunniit peqarfiusinnaasunut nunaqavissut salliusussaataaannissaannik Naalakkersuisut sulissuteqalersaangillat. Siusinnerusukkut akissuteqaammi

allassimasutut, sumiiffiup Qeqertarsuatsiaat eqqaanniittup korund-inik (ilanngullugit rubinit) peqarfeqartutut paasineqartup, annikitsumik aatsitassarsiornissamut akuersissutit aqqtugalugit nunaqavissunut inniminnerneqarnissaat Naalakkersuisut qulakkeereerpaat.

Taamaattoq peqatigisaanik eqqaasitsissutigissavara aatsitassanut ikummatissanullu inatsimmi § 2, imm. 1-imi erseqqissumik allassimammat, Kalaallit Nunaanni aatsitassanik piginnittuunissamut atorluanaanissamullu piginnittussaataaneq Namminersorlutik Oqartussaniimmat. Aammalu § 1-imi allassimammat, aatsitassanik naleqquttumik isumannaatsumillu paaanerup qulakkeerneqarnissaa aatsitassanut ikummatissanullu inatsimmi siunertaasoq, tassanilu ilaavoq isumalluutunik atorluaanissaq, avatangiisini inuiaqatigiinnilu piujuartitsinissaq siunertaralugu.

Ulluinnarni amerlanertigut najukkami innuttaasut siulliullutik, assersuutigalugu sumiiffinnut ujaqqanik pinnerasaasiassanik peqartunut nutaanut ilisimannilerpartut, taamaattumillu ujarassiuut assersuutigalugu GEUS-imeersut imaluunniit aatsitassarsiornermik suliaqartut ujarassiornikkut misissuinernik suliaqarnerisa aallartinnissaat sioqputerujussuarlugu, kisermaassisussaataalluni annikitsumik aatsitassarsiornissamut akuersissummik qinnuteqarnissamut periarfissaqarlutik.

d.

Najukkami innuttaasunut makkuninnga periarfissaqarpoq:

- 1) Aatsitassanik nunaannarmiittunik inuussutissarsiutiginaq katersineq. Taanna akuersissummik peqarani ingerlanneqarsinnaavoq aammalu aatsitassat tamarmik, aatsitassat akisuut, tassalu diamantit, safirit, rubinit, smaragd-it, chrysoberyl-it, opal-it aamma aatsitassat qinngornernik ulorianartunik akullit pinnagit, pineqartunut ilaallutik, takuuk aatsitassanut ikummatissanullu inatsimmi § 45, takuuk § 45 c. Tassa imaappoq aalajangersagaq taanna malillugu aatsitassat akisunnginnerusut imaluunniit akisuut tuniarneqarsinnaangitsut. Aalajangersagaq sukisaarsaatigalugu soqutigisaralugulu katersisartunut, tuniniaanissamik soqutigisaqanngitsunut, sammitinneqarpoq.
- 2) Inuussutissarsiutigalugu ukiumut 100.000 koruuninik aningaasartalerlugu killeqartinneqartunik, aatsitassanik nunaannarmiittunik katersineq aamma aatsitassanik paaaneq. Tamanna akuersissummik peqarani ingerlanneqarsinnaavoq aammalu aatsitassat tamarmik, diamantit, safir-it, rubinit, smaragd-it, chrysoberyl-it, opal-it aamma aatsitassat qinngornernik ulorianartunik akullit, pineqartunut ilaallutik, takuuk aatsitassanut ikummatissanullu inatsimmi § 45 a, takuuk § 45 c. Aalajangersagaq katersisartunut, aatsitassanik akisunnginnerusunik tuniniaallutik killilimmik aningaasarsiorusuttunut, kisiannili annikitsumik aatsitassarsiornissamut akuersissummik pissarsinissamik kissaateqanngitsunut, sammitinneqarpoq.
- 3) Kisermaassisussaataitanani annikitsumik aatsitassarsiornissamut akuersissummi aatsitassanik katersineq aamma paaaneq. Kisermaassisussaataitanani annikitsumik aatsitassarsiornissamut pisinnaatitsissummik pigisaqartoq aatsitassanik tamaginnik ujarlernissamut periarfissinneqarpoq. Pisinnaatitsissummik pigisaqartoq aningaasartai killilersorneqanngitsumik aatsitassanik akisunnginnerusunik paaasinnaavoq. Pisinnaatitsissummik pigisaqartoq aatsitassanik akisuunik nassaaruni aammalu taakkua piarnissaannik kissaateqarluni, pisinnaatitsissummik pigisaqartoq kisermaassisussaataalluni annikitsumik aatsitassarsiornissamut akuersissummik qinnuteqassaaq, taamaalilluni inuk

taanna sumiiffimmut pineqartup aatsitassanik akisuunik nassaarfigisaanut kisermaassisussaatitaaffeqalissalluni.

- 4) Kisermaassisussaatitaalluni annikitsumik aatsitassarsiorluni misissuinissamut akuersissummi aatsitassanik katersineq aamma piiaaneq. Kisermaassisussaatitaalluni annikitsumik aatsitassarsiornissamut akuersissummi pisinnaatitsissummik pigisaqartoq sumiiffimmut 1 km<sup>2</sup>-isut annertussuseqartumut kisermaassisussaatitaaffeqarpoq aammalu aatsitassat akisunnginnerusut aamma aatsitassat akisuut piiarsinnaallugit. Aalajangersagaq innunut nunaqavissunut, aatsitassanik tuniniaanermikkut annikinnerusumik inuussutissarsiornermik suliaqarnissamik kissaateqartunut sammitinneqarpoq.
- 5) Kiisalu nunaqavissut soorunami aatsitassanut ikummatissanullu inatsimmi aalajangersakkat nalinginnaasut naapertorlugit aatsitassarsiorluni misissuinissamut aamma piiaanissamut akuersissummik qinnuteqarnissamut tamatigut periarfissaqarput.

Inussiarnersumik inuulluaqqusillunga

  
Andreas Uldum